



Sabtu, 14 November 2020

Ogen: Daniel 3:16-18



“KINITEKEN LA MOBAH”



Enterem jelma si ngaku kalak Kristen i bas paksa gundari, tapi la piga kalak si ngasup mpertahanken kinitekenna man Dibata. Erbage cara Dibata nguji kiniteken sekalak jelma; banci saja arah masalah-masalah si reh ku tengah kegeluhennta. Kune situasi sibagenda iperhadapkan man banta tentu ndele kel ateta, janah tupung kita ndarami jalan keluar turah ukur si gendek alu ngerembakken kita kubas dosa. Kitab Daniel 3 :16-18 nuriken kisah perjuangan kiniteken Sadrakh, Mesakh ras Abednego. Ibas paksa si e raja Nebukadnezer erbahan patung emas 27 meter ganjangna ras merentahken kerina jelma arus erjimpuh guna nembah patung e. Janah ise si la nembah ibenterken ku ginuhur api si gurlah. Situasi paksa e jadi tantangan si mbelin kel sebab lit tertulis ibas kitab Keluaren 20:4-6 maka ola nembah patung. Ia arus milih nembah patung e ntah imasukken ku ginuhur api, ras pertimbangan sideban eme mpertahanken gaji ras pe pendahinna. Paksa si enterem jelma termasuk pe kalak jahudi si lit ibas ingan e memilih nembah patung e perbahan mbiar ia ihukum. Tapi **Kiniteken** Sadrakh, Mesakh ras Abednego **La Mobah** pang ia mbuat keputusan guna la nembah patung. Pendidiken kiniteken si ialokenna ngasup erbahan ia ertahan i bas tantanganen si mbelin si lit iadepenna.

Banci saja ibas jamanta genduari, la seri tantanganen kiniteken si seh man banta. La sitik kalak Kristen si mobah kinitekenna erkiteken perjabun, persoalan ate ngena, jabaten, erta ras sidebanna. Ula kal sempat sidayaken kiniteken erkiteken erbage hal tawaren doni enda. Tetaplah ukurta nggeluh ngerembakken ras ngendesken geluhndu man Dibata ras pakekenlah kinitekenndu ibas ndalani kegeluhenndu. Alu bage pasti sidat kemalemen ate ibas Dibata nari si la pernah nadingken kita anak-anakna si nggit nggeluh ibas Dibata maka kita pe ipake guna jadi alat kemulin-Na i doni enda.